

# QUÆSTIO MEDICA

QUOD LIBETARIIS DISPUTATIONIBUS

MANE DISCUTIENDA

IN SCHOLIS MEDICORUM.

Die Jovis 14. Novembris.

M. I. RENATO LE CONTE,

DOCTORE MEDICO, Præside.

*An variolis malè erumpentibus pulvis viperinus.*

I.

**V**ARIOLÆ formæ dedecus, puellis præsertim infensæ & matribus detestatæ, qualibet anni tempestate grassantur, vere potissimum & autumnò efflorescunt, infantibus & pueris familiæres magis quam adultis, nulli tamen ætati parcent; exiguæ sunt pustulæ, extuberantes, fastigiatæ, primum rubræ deinde pallidulæ & saniosæ. Deteriores sunt plures paucioribus, majores minoribus, duræ mollioribus intercutanæ prominentibus, fuscæ rubris & candidis. Non prius erumpunt quin omnes totius ferè corporis partes male afficiantur; cerebrum sopor occupat, sponte manant per genas lacrymæ, rubore vultus suffunditur, amarescit lingua, ventriculus languet, recurrit nausea, vomitus urget, tussis inanis quatit, difficilis crebraque fit respiratio, febris incenditur, artus denique omnes immeriti lassitudine gravantur: hæc vel pauciora variolarum eruptioni anteveniunt & assident symptomata, quæ paulopost malaciscentur & mitescunt velut absolutâ crisi, si modo laudabilis ea fuerit: hoc in morbo nihil tentandum, ubi nullam symptomata minantur perniciem, totum opus fatigenti naturæ committendum, quam præsidia importunè oblata impedirent potius quam expedirent; Si tamen huic muneri impar illa sit, si minus vegetæ sint vires, metusque oppressionis impendeat, tum ea proderit adhibere quæ sanguinis, adinstar musti bullientis, suas veluti sor-des ad superficiem amandantis, vividos conatus possunt promovere.

## I I.

**U**T succos omnes è plantarum partibus expressos, sic sanguinem semel in vitâ spontè fermentescere, quasdamque faeces secer- nere ac deponere necesse est: hinc fatum ineluctabile quod homines penè omnes variolis iussit esse obnoxios; paucissimos sinit esse tutos: contagiosus quippe morbus ille, hujus est indolis ut inèxpertes infi- ciat facillime, quod fieri amat levissimo apparatu, per terra scilicet ef- fluvia ab ægrotantium sanguine manantia. *Ζυμωσμός* hujus, ut nec alia- rum quæ in corpore sunt nusquam solus inculandus calor: Calidum & frigidum facultates sunt omnium minimè potentes. Fermentationem illam inducunt plurimi non unius generis & genii succi quibus san- guis turget, acidus nempe, austerus, acerbus, amarus & similes: ami- co durabilique nexu jungi nequeunt; quin suis mutuo viribus retusis sese invicem penitus subiverint; cum ritè temperati sunt & permixti, tum nec conspicui sunt, nec hominem lædunt: ubi veto ex illis unus ab aliis secretus fuerit, nec amplius mixtus per minima, tunc & con- spicius est & hominem lædit; hunc solitarium succum humoremve ab aliis secretum, eliminare satagit natura, mox per urinas vel per al- vum, modo per vomitum vel per cæca cutis spiracula. ipsi hoc in ni- su nullam præstat opem prudens Medicus, cum eam certo scit fore fa- cile victricem; ubi dubium est certamen auxiliares mittit copias; hinc invariolis ægrè etumpentibus eligit præsidia quæ dictum fervorem, fz- ces sanguinis ad cutim ablegantem, promovent, fermentique vene- num, si quod sit, extinguunt: hujus ordinis sunt diaphoretica, præser- timque viperatum pulvis.

## I I. I.

**I**NTER serpentes vipeta nobilis quod vivos sætus pariat suum ha- buit nomen. Fæminam in coitu præ voluptatis dulcedine, maris caput abrodere, quemadmodum & nascentes sætus matris viscera scindere, quasi patris ulciscerentur necem, mera fabula est. Plures ad menses potest sine cibo vitam protrahere, quem etiam oblatum, ubi semel capta est, ut plurimum respuit. Uno quoque anno bis venire utitur, quatuor aut quinque menses uterum gerit, catulos edit vigin- ti veleriam plures, successive uteri orificio exeuntes, horum ex um- bilico dependet involucrum quod mater linguâ suâ paulatim dirvellit: Verno tempore quandoque etiam Autumno, veterem cutim, quam se- nectam dicunt, exuit, novaque prius latitans conspicua fit; depositâ multò splendidior. Hyeme non subit terræ cævernas ut solent serpentes cæteri, sed inter saxa in arboribus ipsis absconditur. Nullâ sui parte

venenum est, imo tota toxicorum antidotus : vulnus dente inflictum etiam innocuum nisi furore concitata momorderit ; carnes elixæ præcipuas relinquunt in jure vires, quas crudæ continebant. Trochisci ex his veterum arte parati parum utiles, sal quoque eorum industriâ confectum, exiguas habet vires, aut eas viperis non debet : elegantius nunc paratur pulvis ex truncis expoliatis, forficibus capite & caudâ præcis, rejectis interaneis omnibus præter cor & hepar, quæ unâ cum truncis primum aquâ simplici, dein albo vino pluries lavantur, linteo munda teruntur, in umbrâ siccantur, tum demum in frustula scinduntur, teruntur in mortario & cribro trājiciuntur. Hic pulvis insignes habet virtutes, venenis omnibus acidis obsistit, at præsertim sanguiniordes suas ad cutim ægrè propellenti subvenit.

## I V.

**M**IRABILES viperarum vires à pluribus retrò sæculis medicis unâ voce confessi sunt, eas corpus per cutim purgare, venenaque plurima vel intus spontè genita, vel foris immissa, profligare, experientia docuit. tot beneficiorum causa ante politioem chymiam non adeo manifesta : Hujus celeberrimæ artis ministerio non parum illustratur Medicina, mixtorum principia oculis ipsis subjiciuntur, quod in uno quoque simplici medicamento utile est ab inutili vel noxio secernitur, proinde que unde nam suas hauriat vires, palam fit omnibus. Hac arte scilicet in viperâ rectè distillatâ reperiuntur terra, phlegma, spiritus, oleum, sal duplex, fixum & volatile : terra ad medendum prorsus inutilis ut & phlegma ; spiritus pars est salis volatilis phlegmatis portione dissoluta ; oleum illitum extrinsecus prodest pluribus in morbis, eò que magis quò minus sale volatili destitutum est ; sal fixum paucissimum est, acre & mordax ut & salia ejusdem generis ; sal volatile plurimum, omnium medicamentorum sive naturâ sive arte paratorum nobilissimum ; inde insignes surgunt tum carnis tum pulveris viperini vires : Spiritibus quibus abundat sanguis analogum est, hos recreat, reficit, & nifum quo noxia quæque conantur amoliri, corroborat ; intimas corporis partes subit celerrimum, luminis instar, oclusas venarum scarurignes, coherentes meatus, concretos que humores momento dissolvit, noxios que non solum per cutis spiracula, verum etiam per urinas, aluum, & cætera corporis emunctoria pro vario impellentis naturæ conatu eliminat ; qui ipsius alas rescindere contendunt & humi affigere, ne tenuous in auras abeat, vel ne odore suo nares actius feriat. disperdunt ejus volatiles & ætherias vires : illud verò quovis acido spiritu destruitur, cum calce concrefcit in lapidem, nusquam præstantius & magis efficax quam cum solum.

**D**IFFICILIUS erumpentibus variolis viperinum pulverem exhibere semper & ubique tutum, laboranti naturæ succurrit; curim quandoque constrictam & duram laxat & emollit, veneni, si quod sit, vires infringit, à quo principes corporis partes vindicat. Sale volatili puro & à cæteris viperæ principiis expedito hoc in affectu præstantior, quod non vehementius quam par sit sanguinis *ἱσχοῦ* extollat: hoc nempe in morbo cavendum ne sanguis ebulliens nimium assurgat, vel ex congestis imprudenter stragulis, vel ex ambientis æris nimio calore, vel ex medicamentis concitatiorem motum in sanguinem inducentibus, quale foret viperinum sal: ab his præsertim caveas ubi æger in ætatis flore consistit, vel sanguinem habet fervidiorum, vel anni tempestas verna est, aut ultra æstatem non producta: hinc scilicet sordium eliminatio, quæ sensim certisque gradibus promoveri debet, præcipiti nimium cursu ferretur; sic enim fieret ut nonnullæ partes ad exilium damnarentur, quas natura nusquam prosciberet, nisi ultra debitos limites excurrere cogeretur: efferventem nimis sanguinem sive spontè sive medicamentis intempestivè exhibitis, sedabit venæ sectio, semel iterumve vel pluries, si opus fuerit celebrata, tum ne vasa disrumpantur, tum ne æger ferocientis sanguinis copiâ suffocetur: at dum errorem unum vitat medicus, cave ne currat in contrarium, exhibens remedia quæ sanguinem inspissare, ejusque salutaris motus prorsus sistere valeant; ibis quippe medio tutissimus, nec detrahendæ naturæ vires nec adaugendæ, ubi satis validæ sunt, sed ipsi difficilius sordes secernenti mitioribus diaphoreticis, præsertimque pulvere viperino prudenter opitulandum.

*Ergo variolis malè erumpentibus pulvis viperinus.*

## DOMINI DOCTORES DISPUTATURI.

*M. Franciscus Sorand.  
M. Jacobus Le Menestrel.*

*M. Ioannes Groul.  
M. Petrus Pourret.*

*M. Ioan. Bapt. Moreau, Professor Regius.  
M. Euseb. Renaudot, serenissimi Delphini  
primarius Medicus.*

*M. Nicolaus Rainsant.*

*M. Anton. De Caën.*

*M. Isaac Renaudot.*

Proponebat Lutetiæ PETRUS BONNET, Parisinus.  
A. R. S. H. MDCLXXV.

## PARISIIS,

Apud FRANCISCUM MUGUET, Regis & Illustrissimi  
Archiepiscopi Parisiensis Typographum.